



KBC THUSO

Kum 55 Ihinna

Lhamul/July 2018



MANIPUR CHIEF MINISTER
PU N. BIREN TO KBC LAMKAI
HON KIMUTON NA NEI.

August 2018. Events

KCH DAY 19
YOUTH EMPLOYEE DAY - 26

Anthah



"Kapa theng, eini pumkhat ihi bang a amaho jong
pumkhat aitheina ding un, Nangman amahohi hong in"

John. 17:11

KBC Events Pate Nikho 2018 a houbung chomchom a thupi tah a item chomchom a lim kimu phabep.



CONTENTS

THUMAKAI HO

1. Editorial/Christian Natoh	1
2. Jerusalem Houni/Rev. Onthang Haokip	3
3. Houbung machalna ding/Rev. Henjalen Doungel	6
4. Kani Gal/Rev. Henjalen Doungel	9
5. Anthah lop/Rev. Henjalen Doungel	13
6. KBC Vision 2030	15
7. Mission Column	17
8. Men Column	18
8. Women Column	19
9. Youth Column	20
10. Literature Column	22
11. Diamond Jubilee Thuthot	25
12. Report	28-31

EDITORIAL BOARD

<i>Chairman</i>	: Rev. Dr. Hawngam Haokip, President KBC
<i>Editor</i>	: Dr. M. Thonghosei Haokip, General Secretary
<i>Joint Editor</i>	: Rev. Henjalen Doungel
<i>Contributing Editors</i>	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
<i>Cir. Manager</i>	: Ms. Lhingjanem Haokip
<i>Design & Layout</i>	: Hemkholen Haokip

THUSO LAHMAN

Church/Organisation/ DepartmentRs. 300/-

IndividualRs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 8131803543 Contact thei.
Circulation to kisai lam Mobile No. 9862633173 bol ding.



“Christian Natoh”

Editorial

Chule aman abang solchah, abang themgao, abang Kipana Thupha lhangsam, abang chinghoi kaihoi, abang mihil hina apeh ahi; hichu lhacha natong dinga, mithengho pilhinsahana a, Christa tahsa chu khantousah na dinga, eiho Pathen Chapa thudolla ginchat thakhat ihuva hetna ineiyuva, mi khan kilhit ihuva, Christa pilhin dungchan iphah masang seuva dinga ahi. (Ephesia 4:11-13)

ljeh inem itilh, sopite, nanghon nakikou dolu hi lung ngaito tem un, phe leiset lama ching, thaneitah, chuleh milun tampi naumpouve. Ahivagin Pathenin miching tah miho chu jachatsah na dinga vannoi leiset a angol teho alhena, ahat apaoho jachatsah na dinga vannoiya ahatmo teho alhen ahi. (1 Corinth 1:26-27).

Thumakai:

Amasatah in muntina um Kuki Christian chate jouse ahiddeh a KBC member ho jouse chungga i Pakaiyu Jesu Christa minin salaam kahinpe cheh uve. Tulha thupi chu “Christian natoh” ahi toh kilhonin, i houbung leh lhangpi hinkhoa sahphat ding tampi lah a Christian te natoh hi jong poimo tah khat in kagelin ahi. Hiche article ah hin Kuki Christian te lah a Christian natoh hi ipi ham, ahilou le eima chan ding dol ham. Inop kah kah a toh thei ham, chuleh koi hon atoh dingu ham ti ho themkhat itahlang nomun ahiye.

Khatna ah, Christian natoh kiti hi ichan ding dol kichang ahipon, lungset vanga chan eikipe ahi. Sappaovin, ‘Christian ministry is not a right but a privilege.’ Mi

kimkhat chun apa/apu, athepna/achihna, ahilou leh adang dang jalla ama chan dinga kilom sa jong um mai thei ahiye. Amavang, Christiane Pathen natoh vang hi chutobang ahipoi. Hoilai hihen ipi panmun hijong leh eima dei sanga eiki ngensena a kipah tah leh lunglhai tah a na toh chu Christian natoh hijo pontem? Lhacha na itoh thei lei lei jong hi vangphatna khop set a kigel ngaiyah ahiye. David in alabolna ah, 'kahinkho lhum keiya Pakai inna kachen jing ding ahi' ati khu geldoh angaiye.

Anina ah, Christian natoh hi itohnop phat sung bouva kitong ahipon, ahinkhoa kipeh lutna natoh chu ahi. Sappaovin, 'Christian ministry is not a vacation, but a vocation' ahi akiti. Tulai houbung lamkai kimkhat hi phat chomkhat a pengthah a, hou-in kaiho, mipi lah a seithem mana lamkaiya kilhengdoh ho, ahilou leh insung support mu tam te, chuleh adang dang jong ahiuve. Amavang, lamkaiya apan lou teng leh hou-in jong kikhom nom talou mi aum dapoi. Hicheho dinga vang lamkai ding deina a hou-in kai le natohna nei, athanop kah a mipi lamkaiya pang, ahilou leh ama dei hun phat a na tohna nei, chuleh adang dang hiuvinte. Amaho ding vangin chung a kisei, Christian natoh hi atohnop phat sung bouva atoh uva, ahinkhoa kipeh lutna umlou ahiuve.

Athumna ah, Christian natoh hi mi them khat in atoh u chu ahipon, atahsan chate jousea ahiye. Sappaova sei dingin, 'Christian ministry is for all people, not only the chosen few' ti ahi. Mi kimkhat chun ordain kibol ho ahilou leh Houbung office a natong hobou Pathen lhacha ahilou leh Christian natoh a gel jong umkhat inte. Amavang hichu hilou hel ahi. Bishop Paothang in khatvei athuseina ah, houbung miho ahilou leh Christian jouse hi Pathen natong ahiuvin, lhacha a kigoi (ordained/trained minister) hohin mipiho Pathen lhacha na atohna diuva akichuhsah ahiuve. Sappauva, 'to equip the people of God for the Lord's ministry' akitie. Government, industry, business, sports, hoilai muna um jong lehen itohna mun chu Pathen natoh a toh ngaiya ahi. "Service to man is service to God" kito bang in, Pathen chu imu thei lou ahin, asemsa mihemte ijen chu Ama (Pathen) jen akihie tia jong lah thei ahiye.

Lunglut tah a sim jouse chung a Pathen vangpeh chang taken.

JERUSALEM HOU-IN KISAH THUSIM A KON KIHILNA

*Rev. Onthang Haokip
Secy. Christian Edn Board, KBC*

SERMON

Leiset semtil a pat mihemte'n igelkhoh pen chu Houbuh/Houin kitup tah neiding hi ahijingin, tu2 KBC dinmun jong ginchat danin Office lam a sum ahunglut dingjat ahunglouna hi thildang jeh hilouvin, Houbung tin in Houin thah le phatah khat kisah doh ding itup jeh u himaithei ahi. Lenglen David in sah dinga anagon hijong leh gal-hang mi, akhut a thisan asotambah tah jeh a Pathen in achapa Solomon khanga bou asah dohsah ahi. Hitobanga loupitah a kisadoh Houin chu khonungin in suhmangin aumin ahi. Hijong leh tuni hin athah a kisa leh anukhah pen hi Jews hon aboipijing u khat ahi.



Beit YHWH, Beit HaElohim, "House of God", ahilou jong leh "Pathen Hou-In theng" ti hi Hebrew Bible a pao kimandan chu ahi. Hiche Houin akisah laija thilsoh kidang phabep hetdinga phatah, tulai Houbung khanga hetdinga idei hou seidoth nom aum in ahi. Hiho chu;

- a). Houin chu akisah pet in song ho jeng jong akilahdoh pet a kikheng tohsa ahin, b). Houin kisah lai sungsen jong sehcha kivopoh ham, heicha kitupoh ham ahilou leh thih

manchah kimanga kivopoh husa imacha akijadoh hih hel e (Kings 1:7).

Ngaito khom ding:-

1. Leiset chung a koipentah in In asahna a khentohsa song akilaidoh nahet khah em? Hiche hi thil kidang tah Pathen natoh kilahna ahije. Israel gam umdan hi vannoija ahethem ho seidan in Nellei, leinoi lam chu song kisechah jeng ahi tin akihei. Houin mun alaiju chun song tampi alaidoh un, hiche song ho chu Houin sahna a manthei dinga khentohsa ahi tin Bible in eiseipehuve.



Hilchetna:- (According to Gill's Expository sermon)

i).song ho jeng jong akilaidoh pet a kikheng tohsa ahin:-Math.16:18 lam chu ivet leh Song hi tahsanna toh tekah ahidan akimui. "Nangma Peter nahi, hiche song chung ahi kahoubung katundoh ding ahi", atihin itahsanna chung a Christa Houbung theng khat ihidiudan photchetna eimusah uve. Israel ten tunigei hin Messiah ahung hihlajije atiuvin, khonunga ahungna ding ngana thudol tahsan in atuhchah jingun ahi. Amavang Christa Jesu Huhhingpu ahi ti tahsan'a kisan nang le kei

vang leiset chung a mivangpha chungnungpen ihijehun Pathen thangvah ute. Pakai Jesu'n Solchah te mangcha a Ahoubung ahinphudoh dan gahngaitou hite. Amaho chu Ngaman lensep, milham mai2 hijongleu Pakaijin thahat thilboltheina apeuvin thil kidang tampi jong aboldoh thei-jun ahi. Amaho chun leiset thil sangin a Pakai pa lunglhaina ding gel in thichan geijin tahsan na'n apangdet un ahi.

Christa tahsan-na Leng le Huhhingpu a kisan jouse chu Amadinga manchahthei ihuvin, akikheng tohsa Song toh tekah ihuive.

Christa tahsan jal'a ama kin ibollu ahi. Mi kimkhat in Houbung sunga lhacha natohna akilhenteng adajiuve. Abang chu athuphajiuvin ahi. Abang khatte kitchu ama hinkho mandan kikhoh toh masalouva lamkai hiding moh thanop jeng, ahija lah thu hahsa le tohding khoh aumteng mi oimona leh kilepna ding lampi holgunset umdajilou ahi. Hitobang mi chu song kikhengtohsa toh kitekah thei nantem? Kum 29 lam Ministry a kahintohna a hin mi tampi hindan kahinhethdoh aumtan ahi. Amimal in kimin phah hih jong leh Houbung sunoh phah theibep lamkai tampi akiumin

ahi. Hitobang miho chun Pakai lhacha thaonu changho jong jana apoupouvin, kiloikhomna dan le mol ho jong ajuinompouvin ahi. Amaho chihna'n akisong theilheh jengun ahi. Pakai min a kisuhnem ding anompouve. Amaho thulou chu thu'n asangnomjipouve. Mi-vaicha gentheiho khohsahna neilouvin ahaothei le ama thujop thei ho lung holnading, lamkaija apantaina ding sempehtheiding mi ho bou akisahlelpi jiuvin ahi. Hitobang lamkai ho mun'a chu Pathen lhagaovin na atohlou jeh in Houbung chu haltheilouvin thinggo abangjitan ahi. Hijeh chun Houbung/mipi lamkaija panthei seh chu hilouvin Pakai lhacha dihtah, song kikheng tohsa hina ding lunggel hi lhagaova kon a ikihetdohuva ihidiu bou ahi.

ii). Houin kisah lai sungsen thil kisupoh gin akijapoi.....:-

In kisahna a thil kikhethpoh gin kijahlouna umkhamong nantem? Ipi kiseina ham tihi ngaito khamset ahi. Tulai Houbung tampi dinmun ivet leh lungdon umtah ahi. Kilamkaina leh kivaihomdan adihlou jeh a boina sohji ahin, kichungnun chuna aumteng I-Houbungsunguva kiboina ho hi umkhajibou ahi. Ipi jeh a boina hungsoh ham tia ajeh hol'a kisalal ho chu mi vetda leh mitena changjeng kitji ah ahive. Houbung sung aboi teng lhagao mihon apona lhehjiuve. Lhagao mi hilou lamkaihon vang amaho

lunggot solhahna din jachatna ima aneingaipouve. Houbung ahilou leh kiloikhomna ho'a boina tampi hi mi kimkhat in Pathen deisah hilouva ama deisah jeng bolnomna jeh a boina hungsoh ji ahi tihi kinelna bei ahi. Houbung sung boina ho midang in ahinjahdoh ji hi phalou tah ahi. Iboina hou sanga lhagao lam a ihatnau thu akijah ding chu phajo ahi. Itobang boina hijong leh Pathen thu'a sucham mo helvang umlou didol ahi. Hinlah song kikhengtahsa lamkai hilou hon chamna adeijipouve. I-Houbung sunguva chamna le kingailutna, chule lhagaova kipum khatna aumtheilou leh satanpa kipana ahi. Houbung damna, chamna leh halna aumtheina dinga pan ilah cheh diu dol ahi.

Thu khumkhana:- Acts 20:28
 "Hijeh chun Pathen in athisan a achohsa Houbung vah dinga achinguva lhagao thengin napansah u, Kelngoi hon chengse chungle nangma ho chung chang ah chingtheijun" ati bangin, Houbung vengtup leh kaihoi dinga kingense lamkai jouse hi Pakai dinga song kikhengtahsa, hitobanga Pakai lung lhaina geljing pum'a alhacha na itohnauva a phalou ahoilou pamlam mite'n kihoulimna a aneilouna diuvin chingthei tah in Pakai lhacha na tongute tia ikitem u ahi. Achomlam thei pen'a hung kisun thumun hi asimjouse a din Pakai phatthei boh channa hita hen.

HOUNG MACHAL NADING A HOUNG MITEN ITI PAN ILAH DIU HAM?

*Rev Henjalen Doungel
Mission Secretary*

SERMON

Ipi iti ka houbung kakithopi theidem tia houbung mi Pathen ngailu tampi ium un kipa umtah ahi. Hinlah Houbung a dia panlah kiti hi konkhat in angailut l'eh vang in hoilai muna iti pan lahding ham ti ahethem jipon, amapan lahnading mun hilouva pan alah jehin kito monale kihetk'helna chule khonunga houbung sunga thasetna hung soh doh jong aumdapoi. Hijeh chun houbung a pan lah ding dan point 10 anaveo hite.

1. Houinn kaijingin.

Houbung a pan lahnathe i pen chu amasa pena pontho taha houin kai hi ahi. Houinn kai hatna hin houbung mite kingailut na apunsah in chule Pathen ngailut na jong apunsah jin ahi.

2. Milem in pang in.

Mipi houinn kaidia hung ho chibai bola pan hi houbung jephoina le Pathen hou kitup natah ahi. Hiche chibai boh kitih i jatni a bol thei ahi. khat chu ahileh houinn kot a dina mihung kikhom ho chibai bola pan ahin, Khat chu ahikit leh houinn sunga lutjenga touna a toupai louva houinn sunga chomkhat vahle a meseo/nuiseova mipi chu na

kimai ngatpia alungthim uva Houin kaia ahungu chu Welcome ahiu amudoh thei nadiuva nabol leh hijong chu chibai chom khat ahi.

3. Sinmona a manchah thei din umin.

Houinn kaidia hung ho chun ipi angaichat ding ham ti ngaigeh in lang vegeh in, koitabang naosen neija naovin asuhboi aumleh kithopin, Minu koitabang khut onglou auma achapom hahsa sa aumk'ha h jong leh kithopin, Wheel chaira hunga Pathen hung hou aumk'ha h jong leh amakithopiding chun kigo san umin, houin sunga kithopi phataha pan keo hilou vin houinn pama jong na

houbung mi kitho pingai aumleh kithopi nathei chanin kithopin, hichu houbung a dinga napan lah na phapen hiding ahi.

4. Khankho hethem/thothem mi hin.

Tulai khanghi social media ahat in mitam tah in media a kihet to tilou tahsa a kivil to a kivop nading phat anei tapoi. Houbung sunga pan nalah nathei pen chu mijenle jong hi ahi. Khat vei kom komle nainn a chadon ding, ann nedin houbung mi jochanin invite bol jin, hitabang nabol teng hileh Pathen thua kihoulima bible class neipi tei ding ti tohgon neitha hihin.

Hitia hi mikhat na inn a invite nabol a ahileh ichan geija kipah a kingailut na punbe ham ti anaven, hichu houbung a dia napan lah najong hi ahi.

5. Hopubung a din tohthei dang dang jong tongin.

Houbung tamtah hin kimuto khom nading phat hi asem jin ahi. Hichu nupa ahilouleh nungah gollhang ho bible study phat, chule khangdong ho programme chom chom bolna phat.

Mijouse hi natoh neicheh akihin hiche chung chona thildang khat houbunga ding hijong leh boipi ding kiti hi thil bai ahipoi. Hijong leh hitabang Pathen natoh nahi opportunity khat a lah a tomngai tah a pan a pha ahi. Hitabang a pan laho hi khonung le ahinad-

ing ahung kiphong doh jin mipi tahsan ahung chang jin lamkai lentah ahung hithei jin ahi. Hitabang a hi loile gol sema kithokhom na hi houbung adia pan lahnajong hiji ahi.

6. VBS programme a pan lan.

Mitamtah din houbung tamtah in chate a dia agon jiu VBS programme a kithopi hi thilgih tah dan in alang jin ahi. Hin lah hichu hilou ding ahi. Thiljouse a pan ding ti hilouvin nathep na pen pen khata chu bou napan ding tina ahi. Drawing them nahim, cake semthem nahim lasathem nahim, totthem nahim? na line a chubou napan leh hahsalou taha houbung chapang ho kithopi phatah chu nahi ding ahi. hitia chu khonung houbung lamkai namlamkai phatah semdoh naa panlapa/lanu nahi ding ahi.

7. Thina tohte ngailut ankong sokhompin.

Insunga thina toh te ann nehkompin na khat polpi hi athite dia suhmil hoilou thilpha kibol khat ahi. Hiche ankong hin tahsa oiva na apeh keo hilou vin lhagaolama jong kipa na asoji ahi. Ajeh chu hitabang thinia thukisei le nakitong hi hinkho a dia suhmil hoilou ahi.

8. Tilkhouna thuthot boljin.

Tulai hin kijah matnading jouse hi text ahilouleh email akibol tan ahi. Masang laia khuta kijih thuthot kimua kipa nabang kipa

nachu hiche hin apejou tapon ahi. Hiche hi bolding nati leh houbung sunga a group khat tichu khanglai te ham nute ham pate ham khat in homkhen in lang bolin.

Koitabang birthday/anniversary mang aumleh nakhut tah a nasem card nathot leh akipa na lending ahi. Apat dung juija card thot kiti hi loile pai houbung mikhat hina kingailutna umjing na natoh hoipen khat ahin hiche jong hi houbung nangai lut leh nabol thei je.

9. Tehseho vilin.

Mihem tehi toh ding thamding umjing jeng ihiuvin hijeh chun tehseho gavil kiti hi koima pouvin abolman tapoi. Houbung sunga tehse ijat nanei um abon chan list bolin, aban ban chan gavil in, kihoulim pinlang adeithei ding gift neokhat choipeh in ahilou leh anehthei ding khat coipeh in, kihoulim pin chute leh ama hinkho kipa na hin tin alhagao hinkho jong nasuh halthei ding ahi.

Houbung hung kiphutila pan anala tehse ho chu jabol in aphai, ipi jeha anaphu uva ichan kinepna neiya anabol uham ti hetpeh in aphai. Hitabang hi nabol jouleh houbung adia pan lahoi pen chu nahi ding ahi.

10. Taona haman in.

Houbung kithopi ding ititeng ilung thima hung kilang masa-

pen chu cheding, toh ding, seiding ti jeng hi ahi. Thipbeh cha a touthimbeh a taona manding hi houbung kithopina dia phapen ahi tilam inasumil jiu vin ahi.

Mitamtah in abolji chu houbung mijouse amin cheh ahilou leh ainn sung cheh akijih doh a ataopeh jiuchu ahi. Na houbung lamkai ho din taovin, ajite din taovin, na pastor pa din taovin houbung sunga mihil ho din taovin lamkai jouse din taovin, houbung mijousen kipah taha houbung sunga kilung khat tah a pan alah khom jing thei nadin taovin. Lhagaothengin na houbung sunga na atoh nadin taovin, houbung damthei nading le khantou thei nadin taovin, chuti leh nahoubung damthei jin tin nang man jong hiche houbung a chu damthei na nanei ja natoh na lama lama khantou nale machal na nanei ding ahi.

Chung akipe list ho hi ibol ujong umin tin ibol lou ujong umin te. Ipi hileh Christian dihtah khat hina hi nitin hinkhoman in akihen houbung ngailu le ngailulou jong houbungsunga pan alahdan in akihekhen jin ahi. Chunga kipe jouse hi abona ibol joutah lou jong leh ijothai pen ijat ham hi veohitin tong ding leh chepi din kigel lhacheh u hite. Chuteng ihoubung sung damthei jin tin lungmong a pakai na itoh thei dingu ahi.

KANI GAL/OPIUM WAR

(1839-1842, 1856-1860)

Rev Henjalen Doungel
Mission Secretary KBC

Sermon

China te le Britain te kihak in Opium (kani) gal hi nivei anakisat in ahi. Gal masa chu March 18, 1839-29, Aug 1842 chan anakisat in hichi gal chu First Anglo Chinese war tin jong akihei. Hiche gal ahin British sepoi 69 athin, China sepoi 18,000 athin ahi. Hiche gal hi British ten ana-jou uve. Ajotah jehun China gama kiveina lamkpanga thanei na ahin neitaovin kongkai mun 5 ahung chang un Hongkong jong khopi jong ahung chang taovin ahi.



Opium/Kani gal nina chu ahileh October 23, 1856 –October 18 1860 sunga China gam ma ma a kisat ahin hiche gal chu Arrow war ahil-ouleh Second Anglo Chinese war tin jong akihen ahi. Hiche gala hin France ten British te ahin kithopiu ve. Gala hin British sepoi 2,900 lang athiuvin chule China te sepoi 12,000- 30,000 anathin ahi. Hiche gala jong hin British te anahat kitun China gama Kivei na lampang a thanei na aneibe cheh kit taovin ahi.

British ten China to kiveina abo-
nao va thilman chu silver(dangka)
in anapeo vin ahileh dangka chu
amaho gama soh tam lou ahijeh
in Maxico gama achouvin hichu
China te koma thilchoh na a anei
uleh chingthei taha China lengte
chun kivei nachu abolu ahijeh
chun ajonan British te chun sum-
tong amujoutapou vin amang
jotaovin ahi.

Hinlah 19th century hung kipat

tilin British East India Company
(India pumpi analo te) chun Chi-
na tetoh thil kichoh dan chom
khat kinopto na ahin sem un hi-
chu dangka mangcha talouva In-
dia gama kon Opium/Kani joh a
thilman peh dingin ahung kipha
sah taovin ahi. Hiche opium In-
dia gam Bengal a keh hi China
gama keh opium, amahon louva
aman sanguva chu gamchenga
hat jo leh mantam jo ahi. Chu-
banin China gama kani neho

chun ahinchep tho taovin ahileh hichun khamna apeh chu amaho gama kani in apeh bang hita louvin hatah in ahathjo/akham jo tao vin, adeilheh taovin ahi. Kani ne ahung tam tul tul tan ahileh China gama Qing vaihomna chu ahung lungling lao taovin ahi. Ahethemho seidan in 1830 apat chun China sah solam gam golhang 90% chu Kani achun addict ahung hitaove. Hiphath chun gamteni kihak a kivei na chu British te langa ahung hoitan chuti chun China Govt hetlou vin jong aguh in Kani chu British te chun China gama hatah in atolut taovin sumlepai jin haodoh na anei taovin ahi. Alangkhata China te chu kivei na lama hatah in alhasuh tan chule agama khangdong ho atamjon kani anehu ahitah jeh in agam kiventhei nalama jong nasatah in lhah suh na ahin nei taovin ahi.

Opium War.

1839 kumin China gama Daoguang Emperor pan British ten Kani agamsunga aguha ahin tol lut jingu chu tin ding toh gon ahin nei tan ahi. Lin Zexu kiti pa chu Canton khopia din Governor thah din ahin tung doh in amachun aguha Kani China gama hintol lut a pang British mi somlethum aman tan ahileh ajohthil hou amat peh lah achun kani chepna pipe 42,000 le kani kiheng dimset thingkhong 20,000 ajaovin ahi. Hichun aman hiche thingkhong Kani dimset setna kikoi ho chu tuikhanglen sunga lehlutdin

thu apen anasumang taovin ahi. Lunghana dim Britishah kiveimiho chun Britain gama Government koma kithopina ahin thum taovin ahi.

Akumkit July Iha a thilkhat asoh kit in Qing vaihomna le British te vaihomna a kito louna hinpunsah thil soh ahi. Hichu July 7, 1839 kumin jukham British le American kongtol phabep Kowloon gam Chien-Sha -tsui khoa boina anasem un China mi khat anathat un chule Buddhist tempel khat jong ana suseovin ahi. Qing lengpa official ho chun foreigner ho koma chun mithat ho chu ahinpedoh uva athu Chinese te court a tanding atiuleh British te chu ana nom pouvin mithat ho chu amaho court ajoh thu anatanun ahi. Court in Themmo achanun ahin lah Britain gama ahung kile leovin mithat ho chu chamlenna government in anapekit taovin ahi.

Hiche Kowloon thilsoh akon hin Qing lengpa officer ho chun tua lhah British le foreign gammi ho suhkhel aneiuheh China law dung juija achungthu kitan ding ahi ti danthah asemun hiche dingchu anop lou uleh kivei na abol thei tah lou dinguh ahi ti thuphon ahin nei tao vin ahi. Hiche danthah asem naovachu Opium/kani a kivei hi thilphalou dan in aphal lou kivei na ahin bolkhel neite chu China te kivai homna dung juija akipeh lut u ngai ahi ti ajao sah

un ahi.China gama Britishte kivei na lama mopo Superintendent pu Charles Elliot chun hiche kilolna donbutna chun china gama kiveina bol British te Konginn nei jouse chu agamlangu va akinung tol diuvin thu peh anei tan ahi.

Langkhata China gama Opium war/Kani gal hi British te kito mo jeha hung kipan ahi tithei jong ahi.British te kong Thomas Coutts kiti neipa chu khamnathei Opium/Kani migam a kitol luta kivei na a kinei hi anadei pon ahi. Hichun ama October Iha 1839 kumin China a Qing lengpa thusah dung juijin Kani jaolouva kivei na boldin Canton muna Qing to kinop to bol din ahung tan ahi. Hiti chun aman China to kivei ha ahin bol tan ahileh Charles Elliot chun Royal Navy chu order abolin Pearl River chu kong dang hung belou nadin akhasah tan ahi.Nov 3 nin kong Royal Saxon chu China jonin ahung tan ahileh Royal Navel fleet chun ahin kap taovin ahi.Hichun Qing sepai hochu Royal saxon Kong chu kitho pidin ahung kon taovin ahi. Cheunpee muna gal anakisat taovin British Navy chun China te kong tampi anakap setan ahi.Hiche chu Qing dynasty a dia gallalna masapen ahung hitai.Hiti chun aban banin British ten tuichung le leichunga gal ahin bolun 1842 in muntampi analo taovin Qing Government chun gal chu ahin lal tan khonunga apohjou loudiu kinoptona soi chu achai nan chamnading in

ahin kai taovin British te khutnoi-ja ahung um taovin ahi.

Hitabang a hi miching masa British te chun China gam lona dinga hi agam khangthah te khamnathei kani hi anatol lut peh uva gamvai anapohu ahi.Khangdong atamjo khamnathei/Kani a ahung chuh phat un kivaihom na le kilung khat na ahung lhasam tan galsat ding le gamveng bit ding ho kani nea hinkho aman tah jehun foreign gami hon khonung in hattah a kivai pole Gamlen tah China chu adeibang tahin amaho thu noiija akoitaove.Hichu ahethdoh phat uva China government in agamsunga kani hung lut ahin kha uleh gal hung soh a khonunga khangdong atamjo khamnathei ja kibol ahitah jehuva gal lel na jong aneiuva mikhut noiija hung umkha anahi taove. Tunin eiho Kuki chate chenna gam jouse kani kitu louna aumtapi tithei ahitai, Haosa tampin akho chaga komah lousan akilah un kani lei abolsah un khochaga tampin jong achenna gamsunga gamphalai kani tuna thei aumlou jong leh aumna kho dalhan migama acheovin Haosapu lampan apeovin Kani lei agabolun hiti hin igamsungu gamphalai jouse kanni leijin alo-dim tan ahi.

Hiche hin ichana society sung le namsung atoh khah hitam tihi mitam jon ahethem poi.Sumle-pai tampi munan neihtin inchen louchen semdoh nan neijong le-

hen khonung chate tute khangle nampi dinmun ichan anaphah ding hitam tihito gelkah jing angaije. Athupipen khonung Nam dinmun ding hi khesuh cheh cheh ahi. Nampi khompia hung pangding khangdong hon minung phahlal nale hinkho sotlou na a anei muchi tunia minu mipa ten thanom tahle kipah taha itu uhi nikhat le themmo chan na hung hiding ahi.

Kihin so nading natoh ahijeh in koiman tongtahih in tin aseithei poi, Government in jong hiche muchi kitu hi khonung nampi lhahsam nathei ahijallin suhmang nading tohgon anei jing in hinlah aleilhou mipi tetoh pankhomna aumlou jeh in tuni chanin alohling joupoi. Hijeha chu Government to kihoutoh a pan lahkoma hiche muchi in-ampumpiu tahsa le lhagaova lengvaina lama eipui lut paohi kheldoh thei nadinga taona to thoa pan lah ngai ahi.

Vaigei jong leh China ten Kani agamsung uva ahung kitol lutna khangdong ho laha thina ahin poh lut ahethdoh phatun ahinpolut British te galin anasat un anamsungu khonunga ding gelnan anahuh uve. Eiho jong avaigei masanga hi hiche muchi hi igamsung uva kon isuhmang lou uleh nikhat leh aman inampiu eihin suhmang dingu ahi.

LUNGNIL BAPTIST CHURCH

Men Department, KBC No.11.



16- 17th June 2018: Achesanisimsunga Lungnil Baptist Church, Men Department in tahsa le lhagaova Pate Choian Nikhonomtah le lolhingtah in anakimanginahi. Hichenikhoahin Pastor Tingoulen Haokip, Pastor Centre Church Sangaikot, Speaker in apanginahi. Chuleh, Houbung mipite pate lamkaina' inponthotah in pan alauvin, hijehchun KBC thusomangchanachungchehuvakipathuahungkiseije. KBC Pathen in phattheibohjontahen, Amen!

- Men Department, Lungnil Baptist Church.

ANTHAH LOP

*Rev Henjalen Doungel
Mission Secretary*

Sermon

Gamasa Kut/Anthah lop kitihi ipi kisei na ham chule Christian ten init ding u ham init lou ding u ham? ti thudoh hi khatvei kom komleh akija jin ahi.

KBC ten Anthah lop itiu hi Jews te Ga masa kut kiman a kon ilah sonu hidin tahsan aume. Gamasa kut chu khallai le kimang ahin changle mim hung lhunteng anakimang ji ahi. Hichu Judate lhasima Nissan lha 16 nileh kimang ji ahi. (eiho KBC ten vang July last Sunday nin imang jiuve) Hiche nikho chu kalchuh kut nia pat a nithum lhin ni hiji a chule Cholsolou changlhah kut jouva nini lhin nia kimang ji ahi. Gamasa kut kiti chu Pathen in amite achennadiuva apeh Canan gama ahung lhunuva akhutah uva hong a masa gamtep gamchu alhung mong un akhutsoh gao anemong taove ti photchetna a thempu anga ahinchoi lut uva kipa thusei naphat a anaman jiu ahi.

Leviticus 23:9-14 sung hi ivet leh gamasa Pathen a dia peh ding ahina akimun ahi. Hiche nile hin mipi chun honsoh ga hochu thempu pa anga pocha khat a ahin choilut diu, hichu thempunan alahlah a athenso ding ahi. Pumgo thilto, lhosoh thilto le thaotui thilto ho hiche nile hin ahin pohlut cheh jiu ahi. Deuteronomy 26:1-10 sung chu isim leh hiche nikho manding dan kicheh tah in imuthei un ahi. Gamasa hi Pakai anga Thempupa dinga akito a kilhai na akisem tokah a koiman muchi alotup thei lou ahi Lev.23:14. Hiche kilhaina chu l- real te Egypt gama soh a anakihen uva Pathen in akhut thahat a amite ahin huldoh a chamlen hinkho mangdinga khoiju le bongnoi lona Canan gam a ahung chenlut

uva akhut tahuva kihinso nading na ahintoh u agamga mong mong aneh pat u hetjing na a kibol ahi. Hiche nikho chu hapta kisim nan jong ahin mang un ahi. Lev.23:15-16.

New Testament lam ivetleh gamasa Pathen khuta lhandoh na hi sagi vei akimun avetsah na umcheh in akiseije. Paul in Epaenetus le Stephenas insung chu Achaia akon gamasa ahiuve tin anasei je Rom 16:5 I Cor 16:15. Aman aseina chu gamasa kilhandoh chu gatamtah thalhenga kilhan ahin, hibanga chu chung a kisei teni le insung mite jong chu tahsan na hong sunga khonunga mitampihung lut ding vetsah na a hun- glut masa ahiuve ti photchet na a aman ahi. James in jong tahsan

chate chu gamasa ahiuve atin ahi. James 1:18. Changlhem changtah akon akikhen doh banga chu tahsan chate chu atahsan lou ho laha kon Pathen loupina a kikhen doh ding ahi.

Gamasa lhandoh kiti hi Jesu Christa a pilhina ahi... Jesu chu athilah a kon kaithou vin aumin imumil ho laha gamasa pen chu anahitai. 1 Cor 15:20. Thokitna jouva Jesu hindoh kit chun eihon jong thina jouva hindoh kit na inei dingu ahi ti aphochene. Vetkah nan Jesu chu kalchuh kut nia chu kithat hitaleh Gamasa kut nin thina jouvin athou kit e tina tabang ahi.

Gamasa lhandoh ni kilhanna sempa dinga kipa nikho ahibang in Christian ten jong Pathen a dia thilpeh inei tengu leh ipeh pao Pathen kipa na hiji ahi.

Achom lama seidin gamasa kiti hin Pathen in amite ahuh hingna avet-sah in, chule hiche nikho kiman hin Pathen in eipeh honsohga laha kon aphapen ama inung peh dingu ngai ahi ti avet sah e. Chule hiche kilhaina hin mihemtehi Old Testament danin kantalous va Christa tahsan jalla chamlen ihi nao jong aphonhdoh e.

Anthah lop bolding a Bible in ase in na thuchen phabep anaveo hite. Proverb 3:9 "Nalousoh ga masa jouse Pakai jabol nan toh doh jeng in".

Rom 11:16. "Changbong lum amasa athena ahile, changlhah tum jouse apumpia atheng ahi chule

ajung athenle abah chengse jong athenga ahi".

Lev.23:10. "...nachangpal ga masa penu chu thempupa nahin choip-eh dingu ahi.

Pathen in amite sangtah a phatthei aboh ding chu Moses chu anasei peh e. Hiche nikho hi thupi taha Pathen in amite juidinga agelgeh chun Bible mun 13 lama aminphah in ahi.

Pathen lekhabuthenga imu dungjujun Gamasa lhandoh na neiding dan tahlng na ahung aki-nei je.

1. Gamasa lhandoh dingchu Pathen Houinn thenga kipo lut ding ahi. Exo 23:19; 34:26.

2. Gamasa chu Thempupa peh ding ahi Lev 23:10. Num 18:42.

3. Gamasa Pathen henga lhandoh ding chu mijous bol ding hia ahi. Deu 18:4.

4. Gamasa Pathen kipe chu Amahou na toh kikop ding ahi. Deu 26:10

5. Gamasa Pathen henga kilhan nachu kumkhat a khatvei bol tei teiding ahi Neh 10:35.

6. Gamasa hi Pathen miten amakoma kilahi na a abol dinga Pathen tohgong ahi. II Kings 4:42

Gamas kiti hi Hebrew paova "bikkurim" kiti ahin hichu hung teidinga kitep tina ahi. Akitepna a thonlou chu Pathen ahi, hijeh a chu hiche Gamas kiti hi Pathen hina a kon hung kilason paocheng ahin hichu tahsan cha te jousen agelkhoha Pathen anga kilah na nikhoa aneicheh dingu ahi. Hiche

thupehjuihin Pathen thupeh juina avetsah ahi.

Lungthengsela hiche nikho iman jing laiun tulaijin mitam tah hi honlei thinglei bol talouva kihin so nadinga Government Service bol itam taove. Hijeh chun hiche nikho hi muchi chivo thinghang lousoh ga homai mai pohlut na nikhoa mang louvin government office a natong jousen jong thinghang lou natoh khela itoh u lservice uva

kon imu u lhalo Pakai maicham phunga choikhoma muchi chivo kilhan bang bangin kilhan doh thei leh thilphatah, houbung sun-ga kikhel na lentah hung so nathei natoh hidin tahsan aume. Chut-ileh Anthahlop kiti hi Lounatong ho tohga Pakai Maicham phunga pohlut nakeo hitalouva Govern-ment natong ho tohga jong Pakai maicham phunga pohlut nikho hintin Pathen phatthei ichan nao nikho khat hiding ahi.

KBC *VISION* 2030

Inchen semna hihen houbung kivaihomna hijong leh chule lekha sim nalam hihen nitin natoh na lam hijong leh vision kicheh neiho natoh le vision kicheh neilou ho natoh hi a result soteng akihejin ahi. KBC jong chuti ma achu lamkai masa hon ana vision u dinmuna chu tunia hi ium u ahi. Lamkai ahung kikehel jing in vision jong akikhel jinge. Lamkai jin vi-sion kicheh ahin neilou teng mipi jotnading helouvin amah thah ji tai. Mi-hem khat ahilouleh organisation khat in aphah na hi alamkaipan alung-mita amu a toh gon anei kalval aphah ngai lou ahi. Lamkai vision kicheh neikhah kiti hi Pathen phatthei chan na lenpen khat ahi.

2018 kum Convention lamkai kihel kum ahitoh lhonin lamkai thah inak-ilhen un tuhin Rev Dr Thongkhosei Haokip General Secretary hina noija kivaihomna kong ihin tol taove.

Khonunga KBC dinmunding lungmitna galdot pumin kum 5 sunga itoh-doh dinghouleh kum 10 sunga itoh doh dinghou vision statement pu General Secretary in kicheh tah in tah lang na ahin neije Achom lama hetthei din noija hohi Convention Office tohgon hidinga deisah ho ahi.

1. Complition of Staff Quarters at Head office.
2. Mobile Clinic in needy areas

3. Convention Resource Centre
4. Office renovation or new construction
5. Office compound black topping
- 6.2 Pucca Urinal Shed for common use within office campus
7. More Educational schools
8. Seminars on eradication of Pop-py Plantation in colobration with Manipur State Gaovernment.

General hihen Departmental hijong leh kilungtoh taha khantou machal nadia itoh doh diuva deisah na ahin neiho sikhom thei nadin Planning Committee in lung gel tohgong ahin nei jin Consultation program ahin gongun toukhomna masapen CEC member jouse leh Pastor jouse 8-9th May sung chun KBC Chapel hall a anakinei jin ahi. Hiche toukhomna a tohdinga kisei ho laha chun vision statement hi alolhin theinadin gambih houbung jouse hi hetsah na neiding tin kiphat sah na akinei jin Executive Secretary hon gambih jouse vilna aneia hilchet na abolding in phakisan amasapen in Gambih no 2 a 22nd June nichun ana kichen ahi. Hiche kimuto khom na achun gambih leh houbung lamkai jousen pan ahung laovin KBC khonung ding thu seikhom na anakinei jin ahi. Gambih lamkai hole houbung a lamkai hon hitabang tohgong chung change kipa thu aseiu ahideh in

Gambih Chairman pun "KBC sunga lamkai khata kahung pan nahi kum 18 alhingtang hitabang hin KBC khonung ding thu kihoulim na hi ana umkxahih lai je, tuni hi amasapen ahin kakipapi l'eh in hitabang tohgong hin Convention sunga khantou machal na lentah ahin soding kakinep na ahi" tin kipa thusei na a aseijin ahi.

Hiche tohgong hi maban a jong kinei jing nalai ahin, gambih jouse a lung gel sekhomna program hung kistem jing nalai ding ahi. Gambih/Centre Church pastor hole Gambih/houbung lamkai hon hitabang tohgong hi itosot cheh uva igambih uva ahung lhun teng thanom taha pan inalah cheh diuvon jong temna ahung kineije.

Convention kangailui tijousen khonunga ahung hinading gelna le semna in pan lacheh utin alolhin thei nadin taonan geldoh jingu hite.[photo]

Keikol Houinn ki thenso.

KBC in Meitei Mission field inei hou laha monpi umpen khat a seithei chu Keikol Baptist Church jonghi ahi. Hiche houbung miten kumkhat lam lutna ahin sah u Houinn chu achesa 16 June nichun kot



honna le thenso na Rev Henjalen Doungel Mission Secretary in ananei tan ahi.

Pathten in hiche houbung hi phatthei boh jing hen lang machal naleh khantou na pejing taken.

Mission Column

Tripura Mission thu

Achesa 5 -6th June 2018 nikho 1:30 Pm chun Tripura Mission thu to kisai jin MBC le INBA Mission Secretary to Tripura Baptist Churches Union (TBCU) lamkai ho kimupi din anakikal songe.6 ni nilhah lam



4:00 pm in TBCU General Secretary le atoh khompi Associate General Secretary pu kakimuto piuvin partnership a natoh khom ding dan seikhomna kanei khom un ahi. Hiche natoh khom chung changa partnership sign bolding hi MBC level a boltah dinga pha

akisah jeh in MBC le TBCU kihetthem to na noija Tripura gama Baptist Missionary lutjousen na itoh khom dinga ahi. Ajing in Evangelical Synod Church (ESC) Mission Centre vilna aga kinei jin Rev Lethang Gangte Field superintandent to kimuto na aga kinei je, chule tule tua amakoma pansa a hamle paojila mission natong dia kigotna nei KBC Missionary Seikholen Guite jong kimu pina agakinei jin ahi.

Ngailut jalla Office hung vil.



Saisom Sajai Baptist Association Tripura Executive Secretary in KBC vilna hung nei.

Achesa nisim 29 June 2018 ni chun Rev parimal Kaipeng Executive Secretary TBCU in KBC vilna eihung neiun ahi. Mission

Board in kipah tah in lemna anakinei jin General Secretary Office a kimuto pina le chadon khom pina akinei jin ahi. Chujouvin nilhah lam in ngailut ankong sokhompina jong Hotel Grande a anakinei pin ahi.

Rev Letlal Haokip Pastor Journey Church Delhi in KBC office hung vil

Achesa 15th June nichun sopi Rev Letlal Haokip Pastor Journey Church Delhi in KBC office eihung vilun kipa thu isei un ahi. Amahi KWS Delhi pastor apoh laia KBC in Ordained anabola lolhing tah a houbung anapoh ahi. Amahi Tuibong Centre Church mi ahin Pathen ngailut anatoh na lam lama ponthotah, ahung konna KBC gelkhoh pastor khat ahi.

Men Column

HETSAH NALEH TEPNA

Ahung lhung ding 15 July, 2018 nikho hi Convention Calender of Events dungjui jin LOM RESOURCE CENTRE Nikho ahitoh kilhonin, Programme hi eima Houbung Men Department lamkai ho gonna noija anop na thei channa ikigon uva chule Tao na leh thilpeh na (offering / Tolom) jong ebol cheh diovin kahin hetsah e. Thupi "Abonchaova agamsungauva lung monga um ding ahiuve" Ezekie: 27b. Chujongle Speaker ding hi eima houbung/ gambih lamkai cheh in ikigon dio ahitai, chule KBC Office langa konna hinsol ding aum khah leh agang thei lam in Pastor patoh hung kigong toh intin nahin kihetsah dio ahi e (iham tia mi ahung kisol khah tah leh Pakai minna Speaker pa nakiman chah khom pi'uva cholam jong nahin gon peh diuvin Pakai minin kahin tem'uve).

TAONA ITEM:

1. Lom Resource Centre lolhin na dia tao ding
2. Lamkai ho dia tao ding chujong le Pate ho jousen lungkhat tah a pan lah khom thei nading.

Rev.Kaikam Chongloi, Secy., Men Dept. KBC

KIPA THUPHON

17th JUNE 2018, PATE NIKHO LOLHING TAH A KICHAITA:

Tukum jong Pathen phat najallin, Houbung tin leh Gambih tin nin PATE NIKHO lom tah in imang chaithei taovin ahileh hatchungnung Pathen chu thangvah in umtahn lang, chujongleh chol le nang nga go le dai kai hen lang sunpi nisa sa jong leh programe lolhin thei na dia tomngai tah a pan la ho jouse, mipi hihen, lamkai hihen lang, speaker a pang hijong leh na chung cheh uvah kipa thu seijou lou ahung kiphong nge, Pathen nin phatthei naboh jing taohen.

Rev, Kaikam Chongloi
Secy. Men Dept. KBC.

Women Column

KBC WORKING WOMEN HOSTEL NEW STUDENT SELECTION, 2018 JULY - 2021 JUNE A DINGIN NOIJA CHENGHI LHENDOH AHITAI.

1. Lamboikim Kipgen	(F/No.479)	BA 1st	= Pangjang KBC No.3	(----pc)
2. Hatboithem Doungel	(F/No.482)	BA 1st	= C. Aisan KBC No. 3	(67.4 pc)
3. Kholnuntheng Haokip	(F/No.478)	BA 1st	= N Songlung No.4	(--- pc)
4. Nengpichong Haokip	(F/No.461)	BA 1st	= Kotlen KBC No.6	(62 pc)
5..Nengminnei Haokip	(F/No.469)	BA 1st	= Maokot KBC No 6	(67.5 pc)
6. Vahneilam Khongsai	(F/No.452.)	BA 1st	= L.Hengjol KBC No. 7	(---- pc)
7. Chinneilhing Haokip	(F/No. 458)	BA 1st	= CC B.Vengnom no 8	(83. 4 pc)
8. Lamneithem Doungel	(F/No.465)	BA 1st	= C/C S.Canaan No.8	(63.6 pc)
9. Julie Nenghoichong	(F/No.476)	BA 1st	= M.Lambulane KBC . 9	(74 pc)
10. Esther Hoinomneng Baite	(F/No.467)	BA 1st	= Lungngil KBC No.11	(65.4 pc)
11. Lhaineichan haokip	(F/No. 503)	BA 1st	= Khopijang KBC No.12	(--- pc)
12. .Lhingzoujam Kipgen	(F/No. 498)	BA 1st	= Gangpijang KBC 19	(73.6 pc)
13. Vahpichong Dimngel	(F/No.459)	XI.Sc,	= Saijang KBC No. 3	(71 pc)
14. KC Chinneineng	(F/No.464)	BA 1st	= B.Aizalon COC	(67 pc)
15..Nengpilhing Kipgen	(F/No. 500)	BA 1st	= Saikotjang Independent	(58.6 pc)

WAITING\ LIST

1. Nengneivah Haokip	(F/No. 489)	BA 1st	= CC B.Vengnom no 8	(69.6 pc)
2. Kimneisang Doungel	(F/No.473)	BA 1st	= I.B.M.C	(--- pc)
3. Neikhohat Haokip	(F/No.481)	BA 1st	= B.Aizalon KCC	(74.6 pc)
4. Elizabeth Touthang	(F/No.474)	BA 1st	= CC Molnoi Area No16	(80 pc)
5. Lenchonghoi Touthang	(F/No.472)	BA 1st	= Motbung TBA	(78.2 pc)

Hetsah:

1. Hostel a umho Kumthum chan bou umthei ding akiiti tah jeh in BA 1st Semester a simpan ding ho 1st Priority kipe ding ahitai. Ijem tia amahon seat chu fill up abol jou lou vangu leh Course dang dangho jong kila ding ahi. Chule Constitution dungjuija 90% KBC mi hiding, 10% chu Houbung danga kon a kila ding ahi.

2. Chunga hung kitah doh tumum 2018 kum a dinga selection mu ho hin Hostel Admission ahung kibol thei diu ahitai. Admission Fee Rs 2,000/- chule Deposite Rs 2,000/- Total Rs. 4,000/- hiding ahin, July 20th, 2018 hi Admission Last date hiding ahin, 20th July kah a Admission hung kibol lou hon koima them mo achan thei lou ding ahi tia hetsah na jong hung kinei ahi.

Women Secretary,
Kuki Baptist Convention.

BQ 2018

THUA HETSAHNA

Bible Quest 2018 hi kumdang sangin tukum hi Form akihomdoh atam in, agom'a form hi 4000 copies tobang akihom doh tan ahi. BQ Form akihomdoh keu hilouva Form akilah jousen jong Themvetna'a pan alahdiuhi akideisah mama jengin ahi. Hijeh hin muntin a um Houbung miten jong tukum BQ a hin thanom tah in pan lacheh dingin kigotna neijing ute.

Form Submission hi August sung geija hithei ding ahitoh lhon in Form jong kilah jing thei ahinalaije. Eimi chenna gamkai jousea koi Houbung kiti louva apang nomjouse dia kigiong ahijeh in Houbung dangho jong temjing ute. BQ Form muloulai, kilahbe nom aumleh KBC Youth Secretary hetsah jing thei ahijinge.



Kuki Baptist Convention in Pathen vahchoi lasahna lam'a inei chasun u KBC Central Choir hi Pathen mapuina le Houbung mite taona jallin amachal jingin Pathen thangvahna ipeuvin ahi. Hito lhon chun tua pangcheng jonghi a term u tukum kichai ding ahitah jeh in athah kilahna hung umding ahitah jeh in Gambih Pastor, Centre Church Pastor, Gambih Lamkai cheng toh kihetto na lekhatot hung kineivah ding ahitan, Pakai lhacha chengin jong ina hetthem sohkei diuvin temna sangpen akineije.

Chule tutu hin KBC Central Choir hin Visual Album bolna dinga hin La ajiljing u ahitoh lhon in Pakai lhacha ho le Houbung miten itaonauva igeldoh jing diuva temna ahung kineijin ahi.

KBC FLEX PRINTING CENTER

KBC Youth Department in Flex Printing machine akichoh dohkal kumkhat lhing ahitan ahinla KBC minana in Banner semna dia ahin jot behjilou hi pohnat umtah chu ahi. Hiche Flex Printing Center hi koima a ahinpon eiho a ahin, sum alut jongleh eiho kom'a luting hijeh in Banner semding neijousen ijot cheh diuva temna ahung kineijinge.

Mundanga sanga lhomjoa kisempeh ji ahitoh lhon'a eima tah kihung hih jongleh ana tongho, amopoho kijahto pia kitem sahthei ahinalaije. Hijeh hin KBC Flex Printing Center hi hinjon cheh ute tia KBC Youth Department a kon'a temna sangpen akineije.

Kijahtopi Theiho:
Machine Operator: Gl. Papao Haokip
No. 8787780493/8131912956

Banner Designer: Gl. Gigin Haokip
No. 7005174106
Avesui: John Haokip
No. 908518998





KUKI BAPTIST CONVENTION



Literary meet 2018

Gambih Pastor, gambih lamkai ho, houbung lamkai ho le houbung mipite jouse nabobchauvin Pakaiya ngailutna salam kahinpeuve!

Ahung lhung ding 19th August, 2018 nikhoa Centre Church, New Lambulane, Imphal mun a Literary Meet - 2018 umding thua hetsahna le temna lekha thot hung kithot le KBC Thuso (June Iha) a anaki-chonsah chu inamu soh uva inahet soh tah diu tahsan auminn, aphot ahung nai tul tul tah lhon a inakigot cheh tah diu jong tahsan aume. Hijeh chun tepna dungjyuia houbung Sunday School Superintendent le houbung lamkai hon houbung Level a phatah a inaboluva, gambih Pastor le gambih lamkai hon gambih level a phatah a inagondoh tei douvin Pakai minin avelin temna le hetsahna ahung kineikit e. Gambih Level a kitetna bolding hochu:

1. Senior 2 le Pilhing 2018 Sunday School simmun Thudoh
(Quiz): (Pilhing simmun 1 to 20);
Senior 2 simmun 1 to 20): Hiche kitetna a athempen/asangpen (First position) Group chu Convention Level kitetna a gambih min a hungpang diu ahi.
2. **Lasah le lam (Choreography):** Hiche kitetna a asangpen/athempen (First position) Group chu Convention Level kitetna a gambih min a hung pang diu ahi.
3. **Painting:** Hiche kitetna a asangpen/athempen (First Position) chu Convention Level kitetna a gambih min a hung pang ding ahi. Anoiya kipeho hi akitetna diu thupi (Topic) ho ahi:
 - (i) Stewardship of Creation (Thilsem le mihem te hinkho Pathen deilam a chintup/ventup)
 - (ii) War and Peace (Gal le tol, chule cham le lungmon)

- (iii) Character Formation (Aphalam le Pathen deilam a chonchan/khanchan semtupna) Hicheng thum hi abon a kigingdiu, anikho leh Lottery a akilah doh pen pen u Paint (lim jih le jep hoi) abol diu ahi.
- (iv) Sunday School Idol/Icon: Hiche kitetna a asangpen/athempen (First position) chu Convention Level kitetna a gambih min a hung pang ding ahi.

Sunday School Idol/Icon hi 3rd August, 2018 (Friday) - 10:00 am to 2:00 pm sunga Baptist Church, Chassad Avenue, Imphal mun a First Round kibol ding, la hi Thadou-Kuki paova Pathen la adei deiyu asah thei diu, hiche nile hin asangpen 5 (Top 5) kilhengdoh ding, hicheho chu anipi (19th Aust, 2018) nile Final Round chelha ding, hichea kon a hi thep man/kipaman sang ding Top 3 (First, Second le Third) kilhengdoh ding ahi.

Essay le Poetry jong hiche (First Round of Sunday School Idol/Icon) nikho lehin kibolding, Essay chu hiche nikhoa hi kichai ding, Poetry chu hiche nikhoa kitetna a kon a asangpen/athempen 3 (Top 3) kilheng doh ding anipi (19th August, 2018) ni le athil jih u chu ahin kichoiyuva Judge ho kom a apeh lut diu, vet louva asimdiu, asim nauva amu jat le jih thoa anajih nauva anamu jat u kigom a hichea kon a chu kipaman sangding First, Second le Third kilheng ding ahi.

Sunday School Idol/Icon (First Round), Essay, chule Poetry Conduct kibolna nikho (3rd. August, 2018) a dinga hung kalsong ho che le valena le neh le chah, chule koitobang anikho masang (Advance) a hung malhun nomhoa dinga neh le chah, gena-touna, kitiho hi Office/Department in mo apoh jou louding ahi.

Essay le Poetry kitetna a pang ding hi thil ima kigot tup theina dingin mi ijat mong ham ti het chet masah angaiye. Hiche chun, hiche kitetna tenia pang ding jousen July Iha, 2018 kichai masang ngeiya Secretary, Literature & Publication, KBC kom a min, houbung min, gambih Number le ama Contact/Mobile Number thonlouva ahin hetsah/ahinpeh lut teidiuva hetsah le tem ahi.

Hetsahna Thei Lampi:

(i) Contact No. 9089593092/ 8414963901

(ii) KBC Sunday School WhatsApp Group

(iii) Gambih Pastor a kon (Through gambih pastor)

VACATION BIBLE SCHOOL!

A promotional poster for a Vacation Bible School (VBS) theme titled "Maker Fun Factory". The poster features a young boy in the bottom left corner, looking up and holding a wrench. The central graphic is a large, stylized "MAKER FUN FACTORY" logo with gears and a sign that says "Created by GOD Built for a Purpose". The background is a grid pattern with various mechanical parts like a rocket and gears. Text on the poster includes: "The Easy VBS.", "Chate dia lhagao leh thasa agom a khantou nading a kitem VBS lekha bu kiman tah a muthei ahi", "Hiche VBS hi tulai khantou natch kitoh a chapang hoding a kigoung ahi", and "VBS Theme: Maker Fun Factory".

Group
Eun. Bible Conv.
India

Chate dia lhagao leh thasa agom a khantou nading
a kitem VBS lekha bu kiman tah a muthei ahi

The Easy VBS.

**MAKER
FUN FACTORY**

Created by GOD
Built for a Purpose

Hiche VBS hi
tulai khantou
natch kitoh a
chapang hoding
a kigoung
ahi

VBS Theme: Maker Fun Factory

Athil a muthei: Lekha choreography/Action La
chapang ho kihil nading a manchah - Visual Aids

Hiche VBS manchah dei hon KBC Office
a manbei tah a muthei ahi

CONTACT: Pastor Haoneo Haokip ☎ +91 9089593092
Secretary, Literature & Publication Department, KBC

Koitobang Vacation Bible School (VBS) bolnom houbung ho dingin tulai khang to kitoh a kitem jilkung (Teacher) ho manchah ding le jil-lai (Student) ho manchah ding lekhabu, Choreography/Action la, Visual Aids le adang dang phatah tah ho adei/angaicha aumle Literature Secretary to kihet toa muthei ahi

Secretary,
Literature & Publication,
Kuki Baptist Convention.

KBC Kum 60 Ihinna
Diamond Jubilee
Taona leh Thilpeh Nikho
(5th August, 2018)
man na ding Thudolla Houbung ho
Thuthot



Pakaiya Ngailut umtah Houbung miteho, amasatah in iPakaiyu Christa Jesu minin salaam kahin peuve.

Phat sotpi inanga jingu KBC kiphudoh kal kum 60 Ihinna Diamond Jubilee chu ahunglung ding 15th November (Thursday) leh Imphal a Head office mun leh KBC Centre Church, New Lambulane mun a iman dinguh ahitai. Tu chan geiya einaching jingu Pathen chungah kipa thuseina golvah loupitah ibol dinguh ahi tai. Loupina Pathen chang jing tachen.

Hiche iman dinguh toh kisaiyin, tunin houbung mite henga hiche hetsah naleh tiemna ahung kineiye. Ahung lung ding nisim 5th August, 2018 (Sunday) nileh Kum 60 Ihinna Diamond Jubilee man na dingah taona leh thilpeh iman cheh dingun hetsah na leh tiemna ahung kineiye. Anoiya hin Taona item ho ahung kipei:-

A. Diamond Jubilee Project ho lolhin thei na dingin taopeh ute. Hiche ho chu:

1. I gamsung uva athi leh hatah a damlou ho pohle/lhohle na dinga manchah ding Ambulance choh ding, hiche hi Dk 10 lacs vel man ahi;
2. Office maiya adan thumna a Diamond Jubilee Memorial Hall khat sah doh a, jin-lhun in nomtah khat a man ding ti ahin, hiche hi Dk 20 lacs vel lut ding ahi;
3. KBC Office campus Black-top bol ding, vutvai khu leh bonlhoh umlou so ding ti ahin, hiche hi Dk 8 lacs vel lut ding ahi;
4. KBC Office sunga lut masat kheh a Reception-cum-Waiting Lounge (alhung/akon doh ho liemna leh kicholna mun) khat sem ding ti ahiye. Hiche hi dk 2 lacs vel lut ding ahi;
5. Genthei kithopina ding leh Meithai-Chaga Endowment fund sem ding, dk. 2 lacs a kipat ding;
6. Head Office a building leh asunga facility ho semhoi thei thei semhoi ding ti ahi. Hiche hi dk. 10 lacs vel lut ding ahi;
7. Office sung leh poa Toilet (Junbuh/Ehbuh) phadeu khat sah/sem doh ding, hichu dk. 2 lacs vel lut ding ahi;
8. Jubilee Memorial Stone khat jong office maiya tun ding ti ahi. Hiche song vang hi ahung lhung tai.
(Chunga project hohi budget a jong kilang lou, Pathen chate kiphalna leh Pathen tahsanna a bou kingam ah ahiye. Koi tobang houbung-ho, insunga, chuleh changvala kipehna neinom ho kipah tah a kisang ding ahin, houbung hon direct ahilouleh gambih lamkai/ Pastor ho through a jong nahung pan theiyu ahiye. Hichea dingin brochure jong atumin ahung kihome).

B. Programme a minchong jouse taopeh u hite

1. Jubilee Song hong doh ding (Rev. Dr. Hawngam Haokip)
2. Jubilee Memorial hall thenso ding (Rev. S.N. Gangte)
3. Jubilee Souvenir kat doh ding (Rev. D.T. Haokip)
4. Jubilee thupi sei ding (Rev. Dr. M. Thongkhosei Haokip)
5. Lasa ding leh houkhom lasah na a lamkai ding – Central Choir ho
6. Houkhom lamkaiho ding, taona leh adangdanga kimang cha ho ding

C. Thalhenga hung jouse dingin taopeh ute

1. Convention-Gambih-houbunga kona thalheng hung ding ho
 2. Jin-gun kikouho dingho – tekahna a eiho kiloikhomna sung hilouho – MBC, CBCNEI, KCLF, KWS, Kuki houbung dangho, etc.
 3. Gambih/houbung chuleh changvala kona hunga amuna hung lha dingho
- D. Anikho a gojuh-meikai, gamsunga asuboi thei kiphinna leh thuboi-laboi ima umlouva lolhing tah a programme akichai thei na dingin taopeh u hite
- E. Diamond Jubilee Committee Member ho dingin jong taopeh ute:
1. Rev. Dr. Hawngam Haokip, Chairman
 2. Pu Alun Haolai
 3. Pu Jamkhotang Haokip
 4. Rev. Onthang Haokip
 5. Rev. Letpu Kipgen
 6. Ms. Anem Haokip
 7. Rev. Henjalen Dounyel
 8. Rev. Kamboi Chongloi
 9. Pastor Haoneo Haokip
 10. Pastor Henkolen Kipgen
 11. Pastor Satminlen Khongsai
 12. Mrs. Chinneivah Haokip
 13. Mrs. Boishi Haokip
 14. Pi Hekim Khongsai
 15. Rev. Thanglen Haokip
 16. Rev. Silas Haokip
 17. Pu Seithang Dounyel
 18. Pu Seiboi Singisit
 19. Rev. Paojangam Haokip
 20. Pastor Onkho
 21. Rev. Dr. Thongkhosei Haokip, Convenor
- a) Finance Committee:
1. Pu Seithang Dounyel, Chairman
 2. Pi Juliana Dounyel,
 3. Pi Hatneilam Haokip,
 4. Pu Robert Seilam
 5. Pu S. Kaikam.
 6. Rev. Letpu Kipgen, Convenor.
- b) Souvenir & Publicity Committee:
1. Pu Seiboi Singisit, Chairman
2. Pastor Onkho;
 3. Gl. Lalboi Haokip, C/C New Lambulane;
 4. Pastor Haoneo Haokip, Convenor.
- c) Revision of KBC History Writing Committee:
1. Pu Alun Haolai
 2. Rev. Dr. Hawngam Haokip
 3. Miss Anem Haokip, Women Secy.
 4. Pastor Paokhohao Haokip, Secy. Litt. & Pub.
 5. Rev. Dr. M. Thongkhosei Haokip, General Secretary
- c) Hospitality & Reception Committee
1. Pi Hekim Khongsai
 2. Pi Hatneilam Haokip,
 3. Hatkhochin Haokip,
 4. Pi Nengboi Haokip,
 5. Pi Felkim Haokip,
 6. Pi Boishi Haokip
 7. Ms. Anem Haokip, Convenor
- d) Refreshment:
1. Centre Church New Lambulane Board of Deacon ho
 2. Pastor Onkho, Convenor
- e) COLA & Steward
1. KBC Gambih No. 1 Executive ho
 2. Rev. Paojangam Haokip (Gambih

Pastor), Convener

Hiti ahijeh chun, ngailut um-

tah houbung mite hon taona
a igeldoh jing uva, chung a ki-
tah lang Jubilee project ho leh

adang dang lolhinna dinga nisim 5 August nikho (Sunday) ni hileh iumna cheh uva taona leh thilpeh a iman cheh dingun hetsah leh tiemna ahung kineiye. Hiche thilpeh (Tokhom) chu anikho kichai chai leh office a ihung thah lut cheh dinguh hinte. Taona leh kiphal tah a ikipeh nau jalla Jubilee lolhing tah a iman ding kinep leh gal-dot ahiye. Hichea hi changval a hihen, insunga ahilouleh group a hijong leh pan ilah cheh diuvin hetsah leh tiem ihicheh uve. Jubilee kumhi eiho dinga Kumtheng ahitoh kilhonin, Jubilee in adei ipi ham ti ana gelcheh u hite. Hiche Jubilee hi lhagao leh tahsa a kisuh-hal na leh kisuh thengna hinkho inei nadiuvin ana kigo cheh u hite. Lhakit lam leh Kouna leh Programme jong ahung kihom in, thanom tah a hung pang ding ahitai. Pathenin houbung mite vang boh jing taken.

Pakaiya natohkhompiu,

Rev.Dr. M. Thongkhosei Haokip

General Secretary, KBC

Convener, Diamond Jubilee Committee 2018

Boungyang Pate nikho.

Boungyang B/C KBC No. 16. Speaker: Rev.D Doungel. Thupi. Na I sung kistem tuptan. 2nd king bung 20:1 mang chan Pathen thu a ngai lut na neitah in. Mi Pate ho tilkhouna einei uvin .. Achunga kipathu kahin sei uve. Mi Pate hon jong. Pathen thu lunglut tah in. Akingai khom in. Phatchom Pina aki-nei in.. Mipate ho jouse Pathen in phatthei boh jing taken.. Speaker pu le a inn neipi jong Pathen in phatthei boh jing taken. Kaki pah e. Sponsored. By:Women Departments. BBC NO 16.Sd.ST.Letkhomang Haokip Headeacon.

M. Hemkholun Haokip Secretary.. BBC. KBC No. 16.

Gurkhali Baptist Church Songphel Thenso hita.



Kuki Baptist Convention Mission natos Pathen lungset in amachal jinge. Office lama kona tohle tham tampi akigona tahsan thah ho ngaichat le machal nading tampi akiboipi jing laijin, tomngaina neitaha pan hinla a Pathenhing houna hong-sunga hung lutho kikhop khom-nading Songphel Houbungin

Mission te mopoh na noija asahu Houinn chule Missionary Quarter chule Tahsan thah ho chenna ding inn thum laha khat Mr Bishnu inn chu nisim 30 June 2018 nichun Kot hon nale Pathen a lhandoh na akinei tai. Kinthem pun Rev Henjalen Doungel Mission Secretary apangin, houbung mite Pathen thua tilkhouna thuseijin Pastor Seiboi Tuboi gambh Pastor apangin ahi. Thenso na kina jetle veija gambih chule houbung ho jong thanom tah in ahung pangun kipa thanop aumlheh e. Hiche houbung a hi Nepali tahsan thah In-sung 5 kikhom ahiuvin amia sim din mi 24 alhing un ahi. Tule tua hiche houin a mopo chu Evan. Kamal Tamang ahi.

Songphel khojol sunga cheng sopi Nepali hon Pathen ahet thei nadiuva gelk-hoh na nei khotol haosa Pu Kamthang Haokip chung a jong kipa thu sang tah akiphonge. Ajehchu aman agamleiset sopi Nepali ho chenna ding a pehdoh a chule houbung khat kitun doh na dinga nasatah a pan alah ahi. Hitabanga houbung khat in mission natos na lama lunglutna aneija agamsunga cheng Pathen helouhon Pathen ahin kihet doh diu deisah jalla Haosan pan alah hi thil phatah ahi. Aman Lhagao hinkho agelkhoh jala hitabang lolhina hi soh doh ahijallin achunga kipa thu sang thah ahung kiphonge.

Songphel houbung hi Houinn sajing lai ahiuvin ihet ma bangu va houinn sah kiti hi sumle pai homthopet ahin, koitabang houbung chun houinn sahlai ja hi dept. ho jong sumtamlunading project lentah abolsahji lou ahi. Hinlah songphel houbung lamkai hon Mission board ho natos na a kipah taha atosot uva khosunga Nepali houbung khat aphudoh jenguhi Houbung lhagao pentah na gelkhoh ahiu atahlang in achung uva kipa thu akiseije.

Houbung mite natos hi Convention sunga houbung ho dia kitil khou nathei tah khat in akigel in, Khonei haosa ho le houbung hon igamsunguva cheng sopi Nepali holaha Pathen thu alutna houbung pilhing tah tah ahung ki-tundoh nadin eihon jong pan lathei cheh leohin Pathen kipa na jong hintin houbung khosung damna jong hinte. Pathenin amakhou puijing tachen.

KBC EXECUTIVE TOUR REPORT



Pathen lungset na jallin Pathen lenggam na itoh nao amachal be theina dingin kihou khomna neija pan iti lah khom dingham lunggel khomna neidingin Office langa konin General Secretary makai na in atoh khompi Secretary ho toh Executive Tour aki-bol in, achesa nisim 23th June Saturday nikho hin Gambih no. 2 Centre Zalenbunga akchen, chule 30th June 2018 Saturday nikho in jingkah langin Gambih No.3 a dingin Gambih in anagon dungjui jun Saijang Baptist Church mun a akichen, nilhah langin Gambih No. 4 Centre mun a akichen ahi. Hitia akiche na a konin positive Respond phatah tah akimun, Pathen thangvah aume. Hiche akiche na hoa hin Gambih Pastor le atoh khompi Gambih lamkai ho chule akho akho a Head Deacon le Secretary jouse hung khom a kihou khomna le taokhom na kinei ahin, KBC in tohgong inei hou itia pan ilah u le itoh doh thei diu ham tia lunggel khomna akinei na a Gambih langle Houbung langa kon a respond hoitah tah kija chu KBC a kon a hitabanga General Secretary pale atoh khompi Secretary hon lung kitoh tah a pan nahin lah naova hin Houbung mite a dingin jong kitil khounan kalauvin, keihon jong tuban a Pathen lenggam na itoh khom naova KBC in project plan lolhin theina dingin pan hin la dingin Houbung le individual a hung pang dingin thulhuh na asem hou akimun Gambih le Houbung ho jouse chung a kipathu Pakai minin ahung kiphonge. Pathenin ikiloi khomnao KBC phat thei boh jing taken.

Kipa Thuphon



Achesa nisim 26th May 2018 Saturday nikho hin Saitu Baptist Church, No. 4 mun a Gambih Mision Board mopohna in One Day Seminar akibol in lolhing tah in achai theijin Hatchung nung Pathen thangvah aume. Resource Person a eihung pan peh u. Rev. S Prim Vaiphei, President AMCO le Rev, Dr Hawlingam Haokip, President KBC ahilhonin ,Gambih sunga Haosa hole Gambih sunga Haosa hole Hou Lamkai ho chule Lhang Lamkai agomin mi 120 ahung kikhom doh in, Resource Person tenia konin tahsa le lhagao chule khochen vengchen leh Houbung dinmun thupi ngeitah eiseipeh un ahung kikhom mipiten jong aphatchompi tei ding kinepna lentah akineijin ahi. Nilhah lang 3:00pm donin Ngailut Ankong sokhom na akineijin, ahung jouse saba chan khat cheh akipen an neh tuidon phatah in lolhing tah in akibolin ahi. Hitabang Seminar boldoh theina dinga lamchom chom a pan hila Houbung ho leh changval pan hinla adeh a Saitu Houbung le Haosapu le ainneipi chule anikho a neh le chah gongtoh a pang Deacon Board hole Houbung mite chung a kipa thu seijou lou KBC Thuso hi mangchan ahung kiphonge. Pathenin tu le maban ajong Gambih sung kiva homna phat thei jing taken.

Pu Haolun Kipgen
M/E Board Secretary,
KBC G/ No. 4

Pu Donghen Haokip
M/E Board Chairman
KBC G/ No. 4



Teju mun a Tabitha Girl's Hostel KBC mission mopohna noija um chu fenching akikaichai tan ahi.



Arunachal Danglat Baptist Church, Centre church New lambulane in asah chu kijouvah ding in aumtai.



Tripura Missionary Gl. Seikholen Guite Mission Secretary in thah lutna aganei tai.



Keikol Baptist Church Houin thah hondohna le thenso na Mission Secretary Rev. Henjalen Doungei in aga neitai.

Post Regd. MNP/81
Regd No. 18134/88

**2018 Pate nikho mun chomchom a
thupi tah in akimang tai**



If undelivered, please return to
The Editor. KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173